

鞏縣志

卷十三 人物志上
儒林 名臣 政蹟 武功 忠節 孝義

鞏縣志卷之十三

鞏縣知縣李述武纂修

人物志

儒林

鞏志前代無儒林茲合文苑爲一志尊子華子於首以開風氣之先樹訓行之準知文所以載道窮經以明聖教講學以闡絕緒毋繡幣悅飾虛車斯無媿儒林之稱矣至皓首矻矻勤躬修教後進有河汾遺風者亦多采取焉蘄合士林公論云志儒林

程木子

木一作本

〔文獻通考〕晉人著書名子華子劉向校定〔子華子〕違趙適齊趙簡子使董安于寓書以招之子華子答書曰主君之亡臣某不能束修越在諸侯以爲主君憂臣聞之物扃於所甘士扃於所守主君之亡臣不佞而有四方之志其敢以爲執事者之所辱夫邱陵崇而穴成於上狐狸藏矣谿谷深而淵成於下魚鼈安矣松栢茂而陰成於林塗之人則蔭矣主君之亡臣不佞實有隱衷惟執事者昭明其所存如日月之升以光燭於晉國將四海之士重繭狎至以承主君之令聞夫豈惟亡臣亡臣雖復野死以寘溝洫其敢忘主君之賜惟執事者材幸焉〔家語〕孔子之剡遭齊程木子於塗傾蓋而

語終日甚相親顧謂子路曰取束帛以贈先生子路屑然對曰由聞之士不中間見女嫁無媒君子不以交禮也有間又顧謂子路子路又對如初孔子曰由詩不云乎有美一人清揚宛兮邂逅相遇適我願兮今程子天下賢士也於斯不贈則終身弗能見也小子行之

按家語孔子遭齊程木子於途觀子華子答簡子書故違趙適齊而非齊人故文獻通考以爲晉人而通志氏族略又以爲韓人他書或以爲內邱人夫內邱固晉地而非韓分鞏縣子華子故里地近虎牢當春秋晉城虎牢後已入晉迨春秋後三晉分地又入韓故國策以韓有成臯鞏洛之險是時鞏地實半入韓也如是則鞏有子華子故里乃與二通相合府志列子華子賢哲門而案未詳今爲攷定

唐

劉允濟

〔唐書文藝傳〕字允濟河南鞏人其先出沛國齊彭城郡丞璣六世孫少孤事母尤孝工文辭與王勃齊名舉進士補下邳尉累遷著作佐郎采魯哀公後十二世接戰國爲魯後春秋獻之遷左史兼直宏文館武后明堂成奏賦述功德手詔褒答除著作郎爲來俊臣飛構當死以母老丐餘年繫獄會赦免貶大庾尉復爲著作佐郎修國史常曰史官善惡必書使驕主賊臣懼此權豈輕哉而班生愛金陳壽求米僕乃視如浮雲耳遷鳳閣舍人坐二張昵狎除青州長史有清白聲巡察使路敬潛言狀以內憂去官服除召爲修文館學士旣久斥喜甚與家人樂飲數日卒

杜審言

〔舊唐書文苑傳〕審言進士舉初爲隰城尉雅善五言詩工書翰有能名然恃才驕傲甚爲時輩所嫉乾封中蘇味道爲天官侍郎審言預選試判訖謂人曰蘇味道必死人問其故審言曰見吾判即自當羞死矣又嘗謂人曰吾之文章合得屈宋作衙官吾之書跡合得王羲之北面其矜誕如此累轉洛陽丞坐事貶授吉州司戶參軍又與州僚不叶司馬周季重與員外司戶郭若訥共構審言罪狀繫獄將因事殺之旣而季重等府中酣讌審言子并年十三懷刃以擊之季重中傷死而并亦爲左右所殺季重臨死曰吾不知審言有孝子

郭若訥誤我至此審言因此免官還東都自爲文祭并士友咸哀并孝烈蘇頲爲撰墓志劉允濟爲祭文後則天召拜著作郎俄遷膳部員外郎神龍初坐與張易之兄弟交往配流嶺外尋召授國子監主簿加修文館直學士年六十餘卒有文集十卷次子閑閑子甫別有傳

〔施府志〕甫爲鞏人則其由祖父宦鞏時遷居明矣且子美先生之田園多在鞏洛其跡尙可按也

杜甫

〔舊唐書文苑傳〕字子美本襄陽人後徙河南鞏縣曾祖依藝位終鞏令祖審言位終膳部員外郎自有傳父閑終奉天

令甫天寶初應進士不第天寶末獻三大禮賦元宗奇之召試文章授京兆府兵曹參軍十五載祿山陷京師肅宗徵兵靈武甫自京師宵遁赴河西謁肅宗於彭原郡拜右拾遺房琯布衣時與甫善時琯爲宰相請自帥師討賊帝許之其年十月琯兵敗於陳濤斜明年春琯罷相甫上疏言琯有才不宜罷免肅宗怒貶琯爲刺史出甫爲華州司功參軍時關畿亂離穀食踊貴甫寓居成州同谷縣自負薪採相兒女餓殍者數人久之召補京兆府功曹上元二年冬黃門侍郎鄭國公嚴武鎮成都奏爲節度參謀檢校尚書工部員外郎賜緋魚袋武與甫世舊待遇甚隆甫性褊躁無器度恃恩放恣嘗

憑醉登武之牀瞪視武曰嚴挺之乃有此兒武雖急暴不以爲忤甫於成都浣花里種竹植樹結廬枕江縱酒嘯詠與田夫野老相狎蕩無拘檢嚴武過之有時不冠其傲誕如此永泰元年夏武卒甫無所依及郭英乂代武鎮成都英乂武人麤暴無能刺謁乃遊東蜀依高適旣至而適卒是歲崔寧殺英乂楊子琳攻西川蜀中大亂甫以其家避亂荆楚扁舟下峽未維舟而江陵亂乃泝沅湘以登衡山寓居耒陽甫嘗遊嶽廟爲暴水所阻旬日不得食耒陽叢令知之目棹舟迎甫而還永泰二年飲白酒大醉一夕而卒於耒陽時年五十九子宗武流落湖湘而卒元和中宗武子嗣業自耒陽遷甫之

樞歸葬天寶末詩人甫與李白齊名而白自負文格放達譏甫齷齪而有飯顆山之嘲諷元和中詞人元稹論李杜之優劣曰予讀詩至杜子美而知大小之有所總萃焉始堯舜之時君臣以賡歌相和是後詩人繼作歷夏殷周千餘年仲尼緝拾選揀取其干預教化之尤者三百餘無所聞騷人作而怨憤之態繁然猶去風雅日近尙相比擬秦漢已還採詩之官旣廢天下妖淫民謳歌頌諷賦曲度嬉戲之詞亦隨時間作至漢武賦栢梁而七言之體興蘇子卿李少卿之徒尤工爲五言雖句讀文律各異雅鄭之音亦雜而辭意簡遠指事言情自非有爲而爲則文不妄作建安之後天下之士遭罹

兵戰曹氏父子鞍馬間爲文往往橫槊賦詩故其狀抑揚冤哀悲離之作尤極於古晉世風概稍存宋齊之間教失根本士以簡謾歛習舒徐相尙文章以風容色澤放曠精清爲高蓋吟寫性靈留連光景之文也意義格力無取焉陵遲至於陳梁淫艷刻飾佻巧小碎之詞劇又宋齊之不取也唐興官學大振歷世能者之文互出而又沈宋之流研練精切穩順聲勢謂之爲律詩由是之後文變之體極焉然而莫不好古者遺近務華者去實效齊梁則不迨於魏晉工樂府則力屈於五言律切則骨格不存閑暇則纖濃莫備至於子美蓋所謂上薄風騷下該沈宋言奪蘇李氣吞曹劉掩顏謝之孤高

雜徐庾之流麗盡得古今之體勢而兼人人之所獨專矣使仲尼考鍛其旨要尙不知貴其多乎哉苟以爲能所不能無可無不可則詩人以來未有如子美者是時山東李白亦以文奇取稱時人謂之李杜予觀其壯浪縱恣擺去拘束模寫物象及樂府歌詩誠亦差肩於子美至若鋪陳始終排比聲韻大或千言次猶數百詞氣豪邁而風調清深屬對律切而脫棄凡近則李尙不能歷其藩翰况堂奧乎予嘗欲條析其文體別相附與來者爲之準特病懶未就爾自後屬文者以積論爲是甫有文集六十卷

五代

鞏縣志

第三冊

卷之十三

人物

六

河南商務印刷所印

李雄

〔王通志〕能詩莊宗同光甲申歲遊金陵成都鄴下各爲咏古詩三十章以三國鼎峙名鼎國詩

金

盧亞

〔舊府志〕芝田人嘗讀書緱山正大中舉進士第一
〔施府志〕按緱山舊隸永安金改爲芝田今鞏芝田鎮有盧亞狀元坊其故宅在今芝田西北訾店

元

張惟賢

〔歐陽元張公神道碑〕毅子惟敏弟有文名工詩辟掾禮部
早卒御史宋褰爲作張才子傳

明

趙迎

舊府志鞏縣人嘉靖丙戌進士累官兵備僉事所在能稱其
職少時曾讀書於青龍山之慈雲寺中晨夕攻苦於書無所
不讀尤精易數斷驗如神著範圍數二卷生平喜吟咏詩文
已散佚惟慈雲寺後閣題壁詩石刻尙在

范浩

〔舊志〕穎敏博學士類敬服成化辛卯舉人

鞏縣志

第三册

卷之十二

人物 七

河南商務印刷所印

崔遇

〔舊志〕字六合博學文登辛酉舉人

張宏基

〔舊志〕績學能文兩陝副車任河陰教諭士子咸沐教育孫

乾二通渭知縣

國朝

孫汝工

〔施府志〕字帝垂師事張仲誠先生仲誠言性是工夫諸生
多不解汝工曰工夫是性仲誠嘆爲解人以舉人任河內教
諭九年告歸士子思之爲詩以疏瀹性靈爲主著東園詩二

卷

姚爾申

〔續通志〕廩生爲學以明心見性爲根本深爲湯潛庵耿逸庵所契賞湯云義理所見針芥不爽吾道之幸不勝喜躍耿云英卓自立獨能於書冊中尋求大本有希文永叔之風中州傳人意在斯乎所著有日知錄芸窗手草潛陽問答嵩談錄太極圖辨希庵說理學要旨詩文序跋類集共八卷藏於家

趙賜琳

〔續通志〕字玉林鞏縣人年五歲從父受孝經曉大義嘗啟

其父曰人如不孝何以爲人父語以小學易行者輒行之十六通諸經旁涉子史有文名琳曰學非如是已也請於父從耿介受業介與闢佛氏辨老莊論圖書經緯朱陸異同而與孫鍾元共解獨解之說闡發尤詳歸益力行親老不復應科目聚徒講學以明經終

孫又康

〔施府志〕字雪亭廩生精韻學著韻補數卷雪亭詩一卷後入魯山不歸其稿散佚鄉人惜之

閻調鼎

〔舊志〕歲貢生幼喪母事父盡孝早入邑庠務博群書躬行

實踐授徒鄉里蔚然負重望以明經老洛下士大夫惜之

趙作人

〔舊志〕字吉士康熙戊子歲貢以孝友聞嗜學爲文古奧邑令李公重之延爲義學師弟子著錄成名者衆選鄧州司訓未就年八十二卒

趙乘龍

〔舊志〕字御六歲貢生敏於文年少冠童子試後文益高而數奇以諸生終

孫曰明

〔舊志〕郡庠生工文章授生徒寒暑無間所成材甚多

趙國鼎

〔採訪事實〕字玉鉉早歲遊庠有神童之號長厭詞章之學毅然有志於道嘗採龜山夏峯兩先生操心說名其齋以自勵師事嵩陽耿逸庵先生先生嘗援朱子謂蔡季通老友不當在弟子列又稱爲眞能從敬字下工夫其學大抵以求放心爲事以復性爲歸臨終命其子燁湯具衣冠沐浴而卒著有修學錄論辦集語錄若干卷存於家

曹鵬翔

〔採訪事實〕字翰起甲子舉人與兄翊齊名性恬靜不與外事築廬東山下教生徒發明經傳奧義補臨海丞攝啟海關

不名一錢上官噐之任滿告休囊橐蕭然止載殘書數卷

段爲章

〔採訪事實〕少隨父宦鞏遂家焉以詩見知於張道憲聘入幕後以老辭去結茅盤谷東塢更名太和吟哦其中以樂餘年有太和老人詩兩卷

孫祚長

〔採訪事實〕祚長增生與弟祚泰庠生兄弟相切劘如嚴師保而友愛彌篤遂併知名河洛間

趙發軔

〔採訪事實〕拔貢生與兄發祥齊名兄中經魁而軔屢薦不

售人惜其遇邱公時嘗延修縣志

孫型堯

〔採訪事實〕增生與兄河內廣文先生皆近九旬猶授徒講學時季弟汝階亦年八十餘縣令雲南張公嘗造其廬兄弟三人鬢眉皓白杖履優遊張嘆羨久之贈詩有云五更妙義憑誰講三老風光與弟嘗

謝栗

〔採訪事實〕字士材歲貢生性聰敏爲文醇正古茂屢試冠軍與堂兄杰齊名年七十餘選尉氏訓導勤於課士後告歸著有半醒堂詩古文集

孫作樞

〔採訪事實〕歲貢生爲文簡潔不務馳騁出其門者多有先正風格孫夢松亦歲貢生事繼母以孝稱

李思忠

〔採訪事實〕字蓋臣年十四以背誦十三經入庠年十六學使閩中蔡公召至試院命背諸經至爾雅正文及註疏盡卷不錯一字公驚嘆購十三經注疏及全史贈之拔置優等乾隆壬午魁其經揀發陝西知縣未官而卒

孫樹烈

〔採訪事實〕少入庠鄉前輩語之曰汝祖之順公當明季兵燹後人爭收遺粟敗繪汝祖獨拾殘書於灰燼中補綴之汝當光其業烈用是力學敦品後友教汝蔡間遂平李柱石愼許可額其堂曰古之學者孫同然廩生以博雅知名

劉百代

〔採訪事實〕字永傳甲子舉人性孝友母病瀉十餘年炮製藥餌皆身親之不委奴僕和易愷悌人有盤錯事實之一言冰釋爲文清麗兼工詩

孫萬書

〔採訪事實〕歲貢生以文章知名未得遇授徒家塾嘗數十百人經指畫者文有法度善吟詩天真爛熳輒不存稿歿後

但有白松詩百篇存篋中

劉衷濬

〔採訪事實〕歲貢生爲文醇而能肆試輒雄其曹屢躋場屋教授生徒多所成就晚患聾專力讀書嘗日不舉火而文益進以文就正者引繩批根不少惜焉

于秉文

〔採訪事實〕歲貢生明敏好學試屢冠多士鄉場薦元未售人惜其遇選臨漳訓導不赴教授生徒門下多知名士

劉鳳翥 鳳翊

〔採訪事實〕兄弟友愛以勤學相勵翥著樵麓集翊廩生以

端方見重士林教後生精研近思錄小學家禮出其門者率能敦品

張獻錦

〔採訪事實〕性孝友廬父母墓爲弟獻秀取嗣撫若己子鄉里化之

張績

〔採訪事實〕好讀書建學延師有貧士力不足者悉周之成就甚夥孫耀南登戊申科百高入國學

郝爨

〔採訪事實〕貢生家貧力學授徒鄉里來學者常舍不能容

所造多知名之士

趙仲璉

〔採訪事實〕字歸璞增生篤於孝友律已端嚴嗜書史學者多遊其門

焦侗 焦倬

入庠名
琴音

〔採訪事實〕侗增生年十九與嵩陽景東暘同受知於學使閩中林公讀書能窺闥奧與弟倬並以詩古文辭鳴生徒多知名

武應中

〔採訪事實〕舉人孝友成性力學務端品縣令延以爲書院

山長多所成就

劉 誨

〔採訪事實〕廩生以文章知名兼精詩古文辭後生經指授者爲文有法度

張無黨

〔採訪事實〕舉人力學授徒於家以植品爲後生楷模

杜生南

〔採訪事實〕歲貢生號宗川字召芟教人以立品爲先論文以理法爲要尤加意寒士著有制藝三才集遺稿晚年業醫精痘疹著有訂正神應心書二卷有貧民李某少孤其祖寄

葬石子河西岸生南周濟之乃得與祖母合葬祖塋是年秋
水大發河岸盡沒李某深感之子雲喬登乙酉科

曹肅謨

〔採訪事實〕歲貢生以文章知名屢試冠軍數奇不遇教授
生徒多所成就著有印古堂文集二卷

人物志

名臣

鍾山川間氣而名臣出焉以經緯天地爲文章以堯舜君民爲事業樹人倫之師表爲四海所仰望代不數人如鞏志前史漢尹司農之謀誅大憝解釋黨獄宋蔡侍郎之抑后權執國法保賢臣大節讜言傾宸朝野千餘年後先輝映蓋亦嵩邛河洛之精靈所挺生也做施府志載之足爲一邑光矣高山仰止豈在多乎志名臣

漢

尹勛

〔後漢書本傳〕字伯元鞏人伯父睦爲司徒兄頌爲大尉宗族多居貴位者而勳獨持清操不以地勢尙人州郡連辟察孝廉三遷邯鄲令政有異迹後舉高第五遷尙書令及桓帝誅大將軍梁冀勳叅建大謀封都鄉侯遷汝南太守上書解釋范滂袁忠等黨議禁錮尋徵拜將作大匠轉大司農坐竇武等事下獄自殺

宋

蔡齊

〔通志〕字子思鞏縣人〔宋史本傳〕少孤依外家劉氏登甲科第一儀狀俊偉舉止端重眞宗顧寇準稱爲得人詔金吾

給七鬪傳呼以寵之狀元給鬪自齊始累官翰林學士加侍讀太后命齊爲修景德寺文羅崇勳使人趣之許以參政久之不上崇勳讒之罷知河南魯宗道固爭不能得以親老改密州徙應天召爲右諫議大夫兼御史中丞太后崩遣詔尊楊太妃爲皇太后同裁制軍國事齊入白執政曰上春秋富習知天下情僞今始親政事豈宜使女后相踵稱制乎遂罷改龍圖閣學士明道二年拜樞密副使太后姻王蒙正子齊雄坐殺人除名未更赦復官齊入奏以恩廢法如朝廷何帝命降一等齊執不可帝勉從之惟演附丁謂逐寇準併削其樞密題名齊言準忠義乃社稷之臣豈可爲奸黨所誤得不

去上將立富人陳氏女爲后復極論之景祐二年拜禮部侍郎叅知政事與王曾素善坐呂夷簡與曾不相能罷爲戶部侍郎出知潁州特請立州學從之卒年五十二贈兵部尙書謚文忠無子立從子延慶爲嗣延慶字仲遠登進士通判明州歷福建運判提點京東陝西刑獄神宗初以集賢校理爲開封推官辦衛士誣卒筒火入直反坐告者加直史館知河中府召入同修起居注直舍人院兼判流內銓天章閣侍制出爲秦鳳路都轉運使以應辨熙河軍需功進龍圖閣直學士以言罷知滁州歷瀛洪二州復帥高陽定武元祐中入爲工吏二部侍郎卒年六十二賜錢庀葬延慶有學問居簡默

默遇事能別白是非所至有惠政齊後得遺腹子乃歸其宗
凡家所有悉以付之無一毫自取萊人義焉

人物志

政績

士君子出爲世用莫不思以設施自見大而岳牧小而丞尉仕有不同績則均焉邑隸仕版者忠信之長慈惠之師不乏人其廉隅自厲尤多志中所彙載可案矣他邑之名宦故里之鄉賢非名實相副未易得也錄屏風假緋魚其亦思所奮興也歟志政績

晉

稽含

〔晉書本傳〕字君道祖喜徐州刺史父蕃太子舍人好學能

文家在鞏縣毫邱自號毫邱子門曰歸厚之門室曰慎終之室齊王冏表爲征西叅軍封武鄉侯性通敏好薦達賢才後劉宏表爲平越中郎將爲郭勵所害懷帝謚曰憲

北魏

張宗之

〔魏書本傳〕字益本鞏人家世寒微父孟舒劉裕西征假洛陽令及宗之貴幸高宗贈孟舒平南將軍洛州刺史鞏侯謚曰初緱氏宗文邕聚黨於伊闕謀反逼脅孟舒等文邕敗孟舒走元魏宗之被執入京充腐刑以忠厚謹慎擢爲御史中散賜爵鞏縣侯尙書領中秘書進爵彭城公出爲散騎常

侍寧西將軍東雍州刺史以在官有稱入爲內都大官出除散騎常侍鎮東將軍冀州刺史又例降爲侯太和二十年卒年六十九贈建節將軍懷州刺史謚曰敬

張鸞旗

〔魏書〕張宗之兄官中書侍郎東宮庶子兼宿衛給事加寧遠將軍賜爵洛陽男轉殿中給事常侍卒贈洛州刺史謚曰靖

宋

張堯封

〔宋溫成皇后傳〕河南永安人祖穎由進士終建平令父堯

封孝謹好學登進士爲石州推官早卒追封中書令清河郡

王謚景思

張堯佐

〔宏簡錄本傳〕溫成皇后世交舉進士筠州推官吉州有道士與商人夜飲商人暴卒道士逃爲邏者所獲捕繫百餘人轉運使令覆治得其寃改大理寺丞知汜水縣復遷殿中丞知犀浦縣因地狹民繁多田訟堯佐爲正其疆界條衆弊以曉之訟遂簡擢知開州時溫成方爲修媛欲以門閥自表異故堯佐稍進用知開封加龍圖閣直學士給事中端明殿學士諫官包拯等言不宜驟用改戶部侍郎尋兼淮康軍節度

宣徽南院景靈宮四使又賜二子進士出身吳奎等復以爲言堯佐辭宣徽景靈二使以宣徽使判河陽從鎮天平軍卒贈太師堯佐初起寒士持身謹畏頗通吏治曉法律子山甫引進副使樞密副都承旨后父堯封幼從學稽顙所爲文多留穎家後令堯佐詣穎求編次其稿爲序以獻穎不答亦不以獻

元

張恩

〔歐陽元清河張公神道碑〕其先解人後家鞏遂爲鞏人金季爲嵩州安撫使以讜論與達官齟齬勇退家居至元間授

鞏縣志

第三冊

卷之十三

人物

二十

河南商務印刷所印

鞏令有仁政人號張佛以孫貴贈嘉議大夫禮部尙書上輕車尉追封清河郡侯

張思敬

〔曹元用清河郡侯碑〕思敬初襲尹鞏改泣鄆陵沁水洛陽大名鄒平凡六縣陞江陵摠管府判官知均州醴陵州揚州路摠管皆以善治顯大名歲飢輒發廩以賑敬謂同列曰救飢如解倒懸若需郡報則道其殫矣苟以專擅獲戾吾其獨坐先是江陵水漲則漂沒瀕江廬舍迺急築防防完而水大至民免於昏墊

張毅

〔歐陽元張公神道碑〕字彥宏思忠子爲績溪尹累官至江浙叅政偉器雅望歷踐華貫爲時名卿引年間居福壽鼎盛至正間贈推誠翊正贊理功臣奉政大夫河南江北等處行中書省參知政事護軍追封河南郡公謚忠肅 〔南畿志名宦傳〕毅大德中爲績溪尹歲饑勸富民分賑復置義倉儲粟有飛蝗蔽空群虎入境禱於忠烈廟是夕大風雨蝗盡滅又有猛獸如彪逐虎食之民立石以記終參知政事

張惟敏

〔歐陽元張公神道碑〕字孟功泰定間以儒官補集賢院掾吏累官至河南江北等處行中書省參知政事後封梁郡公

鞏縣志

第三冊

卷之十三

人物

二十一

河南商務印刷所印

謚文定

曹鐸

〔施府志〕山東道宣慰副使轉雁門關三邊總督至元十四年誥贈譙國公

明

張祺

〔施府志〕博通經史精法律爲人醇厚端確洪武二十八年同邑康寧皆以才德舉祺授廣東叅政康授監察御史

劉登

〔舊府志〕字升高進士仕行人轉戶部員外郎以苗疆不靖

奉命持節鎮守交趾代尚書黃福行節鉞事南土率服陞參議總督糧儲自陳致仕年九十二卒祀鄉賢

竇祥

〔舊府志〕字文瑞成化辛丑進士知安邑縣政成拜貴州道御史遇事敢言卒祀鄉賢

劉遜

〔舊府志〕字輿謙舉人授兵部司務以廉勤著名調吏部又補都察院司務守官惟謹蒞事惟勤無玷官評卒祀鄉賢

馬隆

〔舊府志〕字世昌成化己丑進士初任桐廬令擢御史巡視

直隸遼東功績茂著轉山西僉事擒白蓮教王銀等晉本司副使推舉提學士類一新年九十二卒祀鄉賢

示容

〔萬姓統譜〕鞏縣人宣德中舉賢良任周府審理

張可久 張可舉

〔舊府志〕久任永年令善於教民事修舉開閘漑田民永利之卒祀鄉賢弟舉知新安縣事亦稱循吏

楊世法 楊葉新

〔舊府志〕世法生平介直不妄與人交初任合水縣持法公平不搖於私擢平涼同知廉潔有守民歌來暮子葉新字無

染好學有文名以恩貢任太平通判覆支收懲奸滑屬邑多盜設法戮其渠魁盜遂息尋陞陝西鞏羌州知州

康紹先

〔舊志〕字繩武由貢生任洪洞主簿轉內黃丞署內黃滑二縣事歷官九載公正廉潔賢聲所在多有致仕歸黎民攀道不忍置

趙景星

〔舊志〕力行孝友弟早卒撫養孀孤里人賢之知獻嵐二縣有惠政祀鄉賢

國朝

鞏縣志

第三冊

卷之十三

人物

二十三

河南商務印刷所印

原鳳起

〔施府志〕字巢閣貢生

國初授陝西襄城縣草昧方始兵戈旁午倉庫空虛百方經理著空城賦以寄慨

張乾二

〔施府志〕字見龍授通渭知縣徇賊作亂極力捍禦至今通渭民猶尸祝之

閻際和

〔舊志〕以才能擢 邑令勞心撫字士民頌之

未載
邑名

謝杰

〔施府志〕字士超以進士任深澤縣有治深紀畧人謂其言多不愧云

曹鵬翊

〔節曹秀先所撰傳〕字萬如父大先司訓新鄭奉檄辦河工館不戒於火翊衝烈焰以濕衣蒙父掖之出父以悸卒居喪盡禮雍正丙午舉鄉試第二補官和平和故巖邑俗好鬪翊爲立鄉正擇老成慎重者教之而以禮優待讀書者俗漸感化邑產鈎吻毒草捐俸買其根焚之復爲文祭山靈種爲絕和之窮民恃海濱煎鹽爲生後鹽產絀且胥黨奪其利民散爲盜弭之不止翊請上官發夫役疏潮口鹽產以盛又請嚴禁胥黨民漸歸舊業政暇爲詩賦古文辭著有大中講義自適集尙友編存存詩草又善書畫片紙皆爲人珍卒於官馬大成

〔採訪事實〕禹州訓導州嘗過象男女聚觀象奴因以爲姦有武生某不勝憤毆之長官欲治生罪大威力爭獲免禹人義之

張檜榮

〔採訪事實〕舉人由孟縣教諭保題郟縣知縣詰奸如神有府憲役幫訟爲奸立柱稟府革退人服明決

人物志

武功

著績兜鍪立勳銅柱固無負鷹揚選矣若怯弱書生信義素孚鄉鄰振臂一呼壯士雲赴殲賊馘渠以保城邑仁者必有勇誰謂三寸毛錐不如長鎗大戟乎志武功

元

張思信

〔曹元用清河郡侯碑〕思信以百夫長從征蜀攻釣魚山冒矢石陷陣授忠翊校尉攻襄陽環甲先登墜而復上者三矢貫甲中股竟執俘以還遷昭信校尉佩金符管軍上千戶

鞏縣志

第三册

卷之十三

人物

二十五

河南商務印刷所印

明

趙成

〔施府志〕明太祖起兵以從龍功於洪武元年任錦衣鎮撫司指揮僉事甲子授階明威將軍永樂八年病終京師奉旨葬祭

霍敏

〔採訪事實〕洪武二年敏授昭信校尉四年征蜀到瞿塘并征雲陽萬州重慶順慶保寧等處九年調沅州衛十年征思州靖州等處蠻洞十六年調平越衛右所後征大小麻哈等處父信贈昭信校尉管軍百戶

張泰定 張本附

〔施府志〕廩生宗正十二年大饑人相食盜賊四起李際遇作亂於登封結申張任三營爲羽翼土寇王升以衆應之聚至五千餘人邑令宋文瑞檄馬指揮協同魏典史捕之屢縮不前賊勢愈熾逼近城邑泰定率鄉勇白玉舉等明賞罰勵以忠孝遇賊於口頭村一鼓破之斬百餘人邑人張本善設計使木庫等夜半斬升首賊黨遂平

國朝

劉體成

〔舊志〕由行伍軍功授山西大同府偏開營掌印守備分鎮

鞏縣志

第三冊

卷之十三

人物

二十六

河南商務印刷所印

榆林堡五年安堵無事有鎮邊之功

陳國用

〔舊志〕原名龍由行伍出征有功授湖廣興國營守備陞叅將

人物志

忠節

昔顏魯公罵賊云吾守吾節死而後已古君子仕於人國遭時不幸肝腦塗地以殉彼豈欲爭後世之名哉慊其中而已然千載下述其事如嚴霜烈日之可畏何其偉歟志中所載青衿報國讀書真種子無愧矣至閭巷細民下及隸役奮其毅然之氣凜凜如生尤可敬也夫擔圭擔爵沒而等於弱草輕塵者何限而茲得以輝映簡冊何其幸歟志忠節

元

張裕

〔李通志〕字康伯鞏人惟敏子由御史臺知班歷官左丞相妻韓氏贈梁郡夫人子師常國學生元末城破全家死節

〔明史〕徐達傳順帝北去踰日達陳兵齊化門填濠登城監國右丞相張康伯等不降斬之其餘不戮一人
裕字康伯明史書字殆以字傳與

姚若時 姚丕顯 姚城

〔明史忠義傳〕若時鞏縣舉人任鳳陽通判居六庄崇正庚辰土寇李際遇倡亂執若時誘之降大罵死族諸生丕顯亦死之若時子城思報父讎請兵討賊賊執之於路亦抗罵死
〔舊縣志〕若時字揆夫鳳陽通判分鎮潁州嘗除隣盜陶浪

子民賴以寧丁艱歸值土寇亂同姚麟徵率族衆禦之親冒矢石數被重鎗寨破猶力戰不屈賊獲其弟剝心剝皮迫令若時從若時瞋目曰我朝廷官豈屈賊耶遂自刎死時年七十三賊裂其屍家人馬連収其骸於海子池山中子城庠生數請兵復仇謀洩被執罵賊死妻王氏亦投井死

姚麟徵 姚鳳徵

〔施府志〕麟徵字瑞一廩生土寇李際遇占轅轅山麟徵世居魯莊正當賊衝知縣檄授練總上官授以督師銜命勦賊土寇益猖狂麟徵偕族人姚若時姚涵等謀守寨賊攻之甚急堅守月餘值大雨外援不至寨破麟徵率族猶力戰不已

賊獲其弟鳳徵碎剗之鳳徵罵不絕口死麟徵母郭投繯死妻楊氏妾三人俱投井死其餘家口麟徵持刀先驅入井後亦投井死時年五十一計同時殉難者一百四十三人有司聞於朝贈麟徵教授立祠奉祀廕其子

姚丕烈 姚丕振

〔王通志〕鞏縣人皆諸生禦賊爲賊所殺

姚 涵

〔施府志〕店六莊同若時麟徵禦土賊寨破同日死節

趙發隆

〔舊府志〕鞏諸生性好學杜門教授寇至或勸其禮賊乃叱

曰讀書以節義爲重今日豈可改易乎遂被害

張燦斗

〔施府志〕增生流寇至協力守城城破殉節

李魚躍

〔施府志〕於城南七里堡遇流賊逼之降大罵賊怒斫死於馬家墳子庠生騰采孫庠生秩同時被傷未死秩老猶時述其祖節烈云

韓山斗

〔施府志〕歲貢生流寇圍鞏山斗登陴固守遙指賊黨大罵城破被執至城下投井死

鞏縣志

第三冊

卷之十三

人物

二十九

河南商務印刷所印

原魁光

〔施府志〕邑民守東門爲流賊所傷城破投南門井中死

杜三印

〔施府志〕三印縣役守西門城破自縊於樓上

劉君德

〔施府志〕土寇至被執脅之降不從以刀恐之益罵賊怒碎其首死 〔舊志〕德遇害賊亦引去洛北人有識德者收德屍得其囊中二百金悉以付德家是亦義士惜失姓名附記之

喬作霖

〔豫變紀畧〕鞏人流寇破鞏縣作霖遇賊不屈其妻李氏抱
霖屍而哭亦被殺

人物志

孝義

語曰山之民多仁鞏孝義之行自昔已多水土龐厚使然矣廬墓讓產折券捐粟有動於中徬徨鬱勃而不能自己豈惟民俗之醇抑亦

國家教化之盛也志孝義

漢

田真

〔續齊諧記〕與弟田廣田慶共議分財生貲皆平均惟堂前一株紫荆樹共議破三分明日就截之其樹即枯死狀如火

然真往見之大驚謂諸弟曰樹本同株聞將分斫所以顛賴是人不如木也因悲不自勝不復解樹樹應聲榮茂兄弟相感合財寶遂爲孝門仕至大中大夫

〔施府志〕按其事蹟不見正史惟齊諧記云京兆人然其宅里墳墓俱在鞏李濂志書之自當載入但時代無考陸機豫章詩中引之有三荆同株句似非同時人濂定爲晉人不知何據

元

張思忠

〔歐陽元張公神道碑〕字誠之恩子仕至嵩州司竹官不樂

爲苛征棄去即不復仕性孝友親疾晝夜不解帶其兄從軍襄樊三月書不達二親憂之公徒步至兵間不避鋒鏑卒獲安耗歸寧其親一日謂其兄弟曰古人有十世共爨者今何爲不然得非俗之不古與兄弟感其言不敢謀析處鄉隣族鄰多所周卹以子毅爲中書參議贈集賢直學士大中大夫上輕車都尉封清河郡侯

明

魏敏

〔中州人物考〕鞏進士授吏科給事中以母病謁告歸省未至而母卒敏卽之墓所哀痛水漿不入口者五日廬墓三年

鞏縣志

第三冊

卷之十三

人物

三十二

河南商務印刷所印

旦夕哀服哭奠如初喪鄉里稱其孝洪武二十六年以守臣請旌其門

康紹光

〔通志〕字誠一諸生時流賊圍城父在城酣醉負父逃行十餘里吐血數升又行十里父方醒得免於難嘉靖己酉登鄉薦知昌黎縣因親老致仕卒祀鄉賢

李寅

〔通志〕鞏人母喪廬墓二年有白鶴來棲之感父喪亦如之分巡商臣題請旌表後以明經任衡水教諭

周一貢 曹清 張紀

〔舊府志〕俱鞏人親死廬墓一貢廬父母墓並廬繼母墓野居九年觀風使旌之

康宗文

〔舊府志〕鞏縣廩生母病自刺其股取血和藥飲之病尋愈
曹俊英

〔施府志〕天啟間廬父墓三載巡按邱經其墓群鳥環繞不去訪知其事巡按遂詣其廬具禮題請旌閭

趙見賓

〔施府志〕事親孝樂善好施百有一歲舉鄉飲賓又十七年卒

鞏縣志

第三冊

卷之十三

人物

三十三

河南商務印刷所印

趙延亨

〔施府志〕父紀力行善亨繼其志歲饑輸粟一千石賑濟邑令申請旌表

趙燧

〔施府志〕甫六歲即以孝聞父病躬親湯藥偶假寐聞父呻吟聲輒驚起問故父歿葬祭不燕客不作佛事鄉人化之

魏進忠

〔施府志〕萬歷間輸粟一千石賑濟邑令申請旌表

謝廷獻

〔施府志〕廩生性好義明季盜起盡出財粟濟貧困大修壁

壘結寨救援六年內耕桑不擾里人賴之

邵良知

〔舊志〕郡庠生明季流寇猖獗避居土寨以保一鄉寇抵寨下率衆下石傷賊無算寨破被執身受十餘刃推棄寨下越一日乃甦壽八十餘

國朝

趙季芳

〔施府志〕順治辛卯亞元歲旱荒出穀麥千斛調卹鄉里全活甚衆任鄆城教諭遷衛輝府訓導造士有方

張昱斗

鞏縣志

第三冊

卷之十三

人物

三十四

河南商務印刷所印

〔施府志〕明季斗懷絲赴河北易粟養親遇寇哀祈憐而釋之順治間以貢生任柘城訓導

孫之緒

〔施府志〕字克纘貢生明季尙幼出構糧遇賊奪其米泣曰有母在寇曰幼子知念母孝子也還之後渡河年十五即僦館授徒順治初入庠食餼子三長祚隆廩貢生以孝友稱事親左右孝養唯謹仲祚廣廩生季祚遠貢生皆以文學知名
康晉吉

〔施府志〕明季負母避亂河北衆競渡母落水吉急投河救母舟人投篙乃得上兄早逝吉撫兄子如己子歲饑人多流

徙吉出所積糧不責券人賴以安

趙朗

〔施府志〕字明陽庠生明季負父逃難備嘗辛苦

李嗣白

〔施府志〕貢生幼失怙家貧負薪供母夜歸誦讀不輟邑令表其閭

謝託予

〔施府志〕貢生少孤事兄甚謹鄉人德之

張越

〔施府志〕字伯遜舉人性孝雖家貧不給能得父歡心任陳

鞏縣志

第三册

卷之十三

人物

三十五

河南商務印刷所印

州學正

于乘龍

〔施府志〕庠生順治間遞送銀兩汜水以無驛推卸龍請上官止送汜水于署前立石記事

按舊縣志永免地方差徭

曹大先

〔施府志〕貢生父含雅稱孝先又以孝稱備色養任新鄭訓導上官委辨河工以勤事死

劉輔

〔施府志〕事繼母稱孝友愛異母弟迎養舅氏歿具棺葬之歲歉蠲米賑饑全活甚衆雍正間公舉授正八品

馬 駮

〔施府志〕庠生事親孝處鄉黨謙謙自下或侮之若無覩遇歲荒數出粟賑親族多沾其惠

徐應奎

〔施府志〕父病奎禱神祈以身代疾尋愈老而益健諸弟無室者罄囊爲周全

喬見龍

〔施府志〕庠生童時聞人說溫清輒曰我當爲之父璜庠生早歿見龍事大父備色養人曰璜有子璜不歿矣

邵宏緒

〔施府志〕偃人有鬻其孤者緒撫之爲娶妻聞其祖卒無所歸緒給銀米使歸葬

楊淑蔭

〔施府志〕字仲賓師事嵩陽耿逸菴先生居鄉以孝友稱孫炳然

〔施府志〕字文甫庠生事親以孝聞取與不苟同邑諸生嘗條舉孝廉二十事於學憲已准題請炳然聞之力拒不可諸生益重之

張 鞏

〔施府志〕廩生性孝行事端方爲人所重凡邑中有大修建

必推爲首以子檜榮貴贈修職郎

謝 檀

〔施府志〕性謹厚少失怙恃待庶母及弟璞孝友彌篤撫姪如己子救貧濟急未嘗有德色

劉復泰

〔舊志〕以濟人爲心疾病婚喪尤其所急邑令申請旌獎

曹含雅

〔舊志〕字子素貢監生三事繼母肫誠曲順不少違以忍讓教其子讓田焚券善行尤多

趙 蘖

鞏縣志

第三册

卷之十三

人物

三十七

河南商務印刷所印

〔舊志〕歲貢生季芳子克繼孝行孀母守節爲育其子孫多

収瘞郭外遺骸

趙賜琨 趙賜牲

〔舊志〕朗子邑大饑調卹族黨得延殘喘弟賜牲每焚券不

責逋雍正十二年洛水溢牲命子分粟賑活百餘家郡守劉

旌其門

朱同升

〔舊志〕貢監生年十一喪父事繼母以孝聞

趙發育

〔舊志〕五歲時父病醫謂宜地黃汁育潛至景山麓不識苗

乃大哭耕者憐之爲代採送歸

蕭永祚

〔舊志〕太學生母安氏病篤籲神祈以身代尋愈喪葬不用浮屠一遵家禮

趙漢

〔舊志〕邑庠生母歿兩事繼母盡孝視姪如子衣履不使少異

徐文正

〔舊志〕性孝歲饑自禹州負米歸道遇賊欲劫之正泣以實告賊憐而還之精醫貧者施丹給米子應庚庚子副榜

鞏縣志

第三册

卷之十三

人物

三十八

河南商務印刷所印

張星良

〔舊志〕吏員歲歉運糧千里外供親膳餘以賙族黨

劉銳

〔舊志〕庠生父母皆病廢臥榻銳侍湯藥飲饌十餘年事孀嫂如兄亟力請旌以彰其節子百代甲子舉人

李昇雲

〔舊志〕事親不以造次顛沛間人稱孝子烟侵親目瞽日夜禱祈尋復明蓋孝所感云

劉王心

〔舊志〕篤孝友兄弟同居終身不分饘爨

孫景舜

〔舊志〕親歿扶匱對畫像輒哭一年竟以思親歿

趙于容

〔舊志〕明季賦役繁重族皆逃亡于容身負重累無怨言後兵亂亦逃亂定後族逃者先歸瓜分其產于容歸不與爭族皆感泣舉鄉飲賓

劉玉璽

〔舊志〕邑庠生賑饑荒設義學家西與偃師接壤出金買路行者便之今名劉公衢

趙錦

鞏縣志

第三冊

卷之十三

人物

三十九

河南商務印刷所印

〔舊志〕兄弟析產後兄子失業錦仍分己田給之極力以救人之難有行客七人阻雪貲罄厚贖之行不以名告

張三聘

〔舊志〕邑庠生好義周急施棺及絮襖殷殷不倦

姚允猷

〔舊志〕例貢生邑大饑鄉人欲逃他方猷惻然出粟分給存活者衆共鐫石道左記其德

姚紹德

〔舊志〕叔父困於歉歲自鬻莊以相全活有趙姓窮無告周之至老不倦掩路斃尤多

劉毓祿

〔舊志〕家析居在城獨在村奉母二十年晉賈七人病死祿爲歛而瘞之修東門石橋以貲助役

孫士相

〔舊志〕歲饑出粟爲人完官逋不索償施棺以助貧不能葬者買地修道便行人

孟澤塲

〔舊志〕慷慨好義修橋黑石渡邑令旌其門

張悅

〔舊志〕悅傭工養母母所嗜物百方搆少許遺母母悅即喜

鞏縣志

第三册

卷之十三

人物

四十

河南商務印刷所印

躍于前歿殯葬皆竭己力見人即勸行孝見彰善錄

張盱

〔舊志〕性孝友親歿兄弟有過輒於木主前引咎自責皆相戒不敢有小嫌焉子輝曾邑庠生亦以孝友傳

王朝重

〔舊志〕重設立茶棚濟行人渴施藥餌不索值家臨通衢大雨水漲多方救護鮮病涉者邑令王旌其門

邢名世

〔舊志〕有趙姓傭歸遺金一鎰於路名世拾以還之有司旌其門

李子希

〔舊志〕兄歿嫂王氏守節希撫姪成立竭力爲嫂請旌伊洛大漲男婦寢食無地希多方安全見雅中丞彰善錄

孫衷蘭

〔舊志〕幼喪父事孀母孝兄弟同居七十年年老姪孫輩欲析產蘭以一子與姪孫三分無私乾隆二年舉壽官

董珪

〔舊志〕服賈至虞城路拾遺金一百二十兩失者至珪還其金失者酬之不受稟虞城令令書還金高義四字關送鞏

喬乘龍 喬吐鳳

鞏縣志

第三册

卷之十三

人物

四十一

河南商務印刷所印

〔舊志〕龍太學生兄歿事嫂如兄撫姪吐鳳曲盡鞠養宗族待以舉火者數十家鳳事母亦孝侍疾衣不解帶終身事叔父如事父

張應甲

〔舊志〕太學生兄歿分財產獨厚兄子

李廷偉

〔舊志〕太學生母歿嘔血死而甦者再事繼母亦得歡心

張印蕙 張士衡

〔舊志〕以醫濟人買曹姓地後曹窮困還其地折券子士衡傾囊與貧欲嫁妻者使夫婦完聚

尙 藝

〔舊志〕雍正九年歲饑在南山口西窪煮粥賑饑民官莊橋
圮出重金補修

喬翰周

〔舊志〕太學生力行善事張家船通衢捐金建茶亭鄉人名
曰惠濟

張萬貴

〔舊志〕郡庠生人有不能舉母喪及嫁娶者皆厚助之金不
惜邑令張旌其門

仇長正

鞏縣志

第三册

卷之十三

人物

四十二

河南商務印刷所印

〔舊志〕山西人賈於豫遂家鞏有李姓負銀二百餘正憐其

困焚券無德色

趙持衡

〔舊志〕性耿介面折人過咸服其直而施與不倦貧者賴焉

賀 進

〔採訪事實〕明季諸生遭亂結寨自固爲流賊李際遇所破
進奔魯庄寨尋又破見獲叱賊曰頭可斷不從爾賊怒將殺
之中有欲脫進者佯曰予仇進深將手刃甘心乃得脫

孟亮元

〔採訪事實〕學務實踐以敦倫持品見重士林由舉人任鄭

州學正孫輝宗登壬午科亦以孝見稱

李大鯤

〔採訪事實〕歲貢生敦孝友應童子試冠軍爲文才氣俊逸竟以諸生終士林惜之

張紹倫

〔採訪事實〕康熙年間紹倫弟紹紀之野遇虎村農叫號莫敢近倫持巨斧直衝虎虎咆哮迎倫倫以斧劈其首虎仆衆以鋤斃之竟攜紀歸

王修身

〔採訪事實〕以庠生例貢少能順親親嘗語人曰此子不在

側吾食不甘事長兄尤謹飲食出入無敢先性喜施鄰里有喪葬婚姻不給者量力助之嘗施義塚地一區以便貧無葬地者

趙廷賓

〔採訪事實〕邑庠生醇謹好禮事繼母人以孝稱年老勤學訓士多所成就生三子梅杰橦俱太學生

馬懋生

〔採訪事實〕庠生資性純朴以孝友端正見重士林教子孫力學處鄉以忍讓爲主有犯者亦勿與校子溫增生孫夢錫敷錫丙午鄉試同榜君錫遊太學人謂積德之報云

姚允修

〔採訪事實〕太學生少從伯父岳生先生學以敦行孝弟爲本內艱後爲寢父側三十餘年族里甚重之

徐士玠

〔授訪事實〕善睦族有太高叔祖居偃師四世喪在淺土無嗣玠爲返葬舊域近門有貧不能室者玠爲婚娶以子洛南貴贈修職郎洛南陝州訓導課士有方告歸後陝人思之

馬懋才 馬懋林

〔採訪事實〕才太學生性篤友愛欲兄專力於學自任家事弟林尚幼善撫之林後入大學而才早世林撫才所出如己

鞏縣志

第三册

卷之十三

人物

四十四

河南商務印刷所印

子才有孫夢魁雲同雲榜皆早入庠

張忞

〔採訪事實〕字怡菴性孝友事繼母無間言母卒未及葬洛水暴漲宅中水深數尺忞撫棺號泣自夜達旦水退得無恙胞弟懷從受學同臥起者二十年嘗授徒錦陽多所成就知名士凡十餘人以貢生選汝寧府訓導卒於官

焦克讓

〔採訪事實〕庠生性篤孝怡怡色養始終不倦親喪葬祭盡禮

孫朝傑

〔採訪事實〕性朴誠力行孝友務踐所學嘗攜子姪外就館
穀身艱於遇而子文沼以文章早知名登己亥科

李中官

〔採訪事實〕庠生篤於孝友性恬淡端品不干外事

張尙仁

〔採訪事實〕好施予路拾遺金招其人還之友封邱孫某貧
嘗厚贈之并經紀其喪置義學購田延師以教鄉之子弟

劉懷瑾

〔採訪事實〕奉繼母至孝力學能詩文著有集屢薦不售人
咸惜之子文英捷賢書

鞏縣志

第三冊

卷之十三

人物

四十五

河南商務印刷所印

張人賢

〔採訪事實〕庠生以孝友見稱入庠後數十年足跡不履城
市務植品以端士風

徐應庚

〔採訪事實〕以孝友見重儒林爲文清古不遂風氣由副貢
任西平教諭課士有方子省歲貢生文學克嗣父業

崔徵珣

〔採訪事實〕性孝友樂善不倦康熙六十年歲大饑出粟以
濟鄉人全活者甚衆

張秉正

〔採訪事實〕增廣生以孝友稱年荒出粟濟人鄉衆多賴以生子漢如江如孫毓麟俱有聲譽序

劉漢玉

〔採訪事實〕性醇謹動必依禮訓里鄰以敦行日數十人傾聽咸爲向善焉

崔錫命

〔採訪事實〕庠生兩事繼母委曲承順無稍違待異母弟無間言尤能植躬勤學

曹從周

〔採訪事實〕幼失怙恃朝夕食必哭奠叔父沒未葬室焚烝

鞏縣志

第三冊

卷之十三

人物

四十六

河南商務印刷所印

烈跣足奮入火爲殺威竟扶柩出

焦隆祚

〔採訪事實〕增生嗜學老而彌篤動遵禮法鄉里推重

路國正

〔採訪事實〕監生歲歉嘗出粟貸鄉折券不求償有桀黠犯之者閉門不與校

馬定清

〔採訪事實〕庠生性孝友贍人困乏有不能婚葬者罄貲周之

祖文炳

〔採訪事實〕庠生性喜施族中有不能爲其子婚者炳各代爲聘娶以延其嗣

姚汝智

〔採訪事實〕與弟汝賢俱大學生伯仲相友愛所出諸子凡人皆和睦如同胞即比鄰或不能辨其伯仲所出

李維城

〔採訪事實〕庠生事繼母孝年六十餘侍疾猶親奉湯藥晝夜不懈諸孫請代曰此吾事也何可代母歿撫弟有恩子整太學生

姚祥兆

鞏縣志

第三冊

卷之十三

人物

四十七

河南商務印刷所印

〔採訪事實〕太學生爲叔父嗣母老病癱與妻子分直侍晝夜歷久不懈有寡嫂賴兆周恤得以完節

李善統

〔採訪事實〕例貢生早孤母孀居叔父母撫之有恩統長事孀母與叔父母始終如一葬親後廬墓三年

逯燦

〔採訪事實〕慷慨樂施康熙六十年歲饑人多就食他鄉燦不忍出藏金數百散給村衆衆各出地券與之燦悉焚其券前令張旌其門子公輔亦以善稱

姚久安

〔採訪事實〕年十三遭父喪夜伏泣哀袖盡濕不令母知族中前輩奇之長能謹身奉母以孝稱

劉鴻誠

〔採訪事實〕太學生居家孝友慷慨好施修學宮書院城垣等公事有力焉邑侯何旌其門

杜君錫

〔採訪事實〕太學生少陵先生三十二代裔少陵祠圯於水族有典祀田以修之者錫出金二百餘鍰贖祠田邑令梁義之與弟雍睦無間

趙質中

〔採訪事實〕庠生族有少寡守節無子者人嫌其貧不肯與爲嗣中分己田數十畝爲立繼請 旌歲饑族間有女已鬻爲人妾未行中急出貲贈還爲擇婿備厚奩遣嫁焉

張炳

〔採訪事實〕太學生以王庄渡口當鞏偃衝施地六畝歲收課修橋以濟行人

趙作相

〔採訪事實〕監生天性孝友好義樂施無德色

焦克誠

〔採訪事實〕由庠生例貢孝友性成力行善事不求人知

路應元

〔採訪事實〕慷慨好義嘗浚玉泉於南山人得灌溉之利修橋甃路孳孳不倦

孫常壽

〔採訪事實〕庠生性孝廬父母墓日夜哭泣不絕夜有羣狼環戶跳躍廬草盡墮忽若有逐之者狼去得無恙

馬賓王

〔採訪事實〕庠生力行孝友務踐所學年八十餘猶手不釋卷訓士嚴勵多所成就

崔克和

鞏縣志

第三冊

卷之十三

人物

四十九

河南商務印刷所印

〔採訪事實〕庠生破產勞心二十餘年撫育孤子以延兄弟三人之嗣其他善事尤夥

雷召純

〔採訪事實〕家貧好義撫二甥成立賙卹鄉鄰老而不倦于德榮

〔採訪事實〕性慷慨嘗買僱民王姓子爲僕後聞其父乏嗣遣之歸並毀其身券

曹啟新

〔採訪事實〕太學生事繼母稱孝歲出金置棺以周貧人至今子孫猶以爲常焉

王淮

〔採訪事實〕精醫術遇貧施藥不索值並以粟帛周之歿後會葬者數百人皆平日所活者

康克明

〔採訪事實〕庠生性孝友親久臥病井水瀉鹵味苦日往南溪三里外取甘泉供飲數年不倦弟早世遺三孤撫之如己出

李 綦 李 荷

〔採訪事實〕綦太學生好學能文數奇不遇與弟廩生荷終身友愛互相切劘荷所學亦有根柢

鞏縣志

第三冊

卷之十三

人物

五十

河南商務印刷所印

劉國相

〔採訪事實〕監生性孝有族子貧無依相承父志爲完婚生子同居三世無間言尤能調卹里鄰子廩生士冠亦以好義聞

劉 誠

〔採訪事實〕事父母曲盡色養和易謙恭爲鄉黨望

康中掄

〔採訪事實〕天性純篤父見背事母以孝稱力學能文弱冠舉孝廉司鐸鄆陵教士以立品爲先去官士人思之

張馨三

〔採訪事實〕邑庠生字子參性孝友勤於學教授生徒成就甚多

董 蘊

〔採訪事實〕太學生少以孝稱長好義嘗施義田十畝課租爲茶亭以利行人

張之祥

〔採訪事實〕恩貢生以孝友稱教授生徒多所成就

馬 渭 馬和祥 馬和榮

〔採訪事實〕渭監生克盡孝友遇貧乏出貲助之無德色族中和祥和榮兄弟亦以樂施稱

鞏縣志

第三冊

卷之十三

人物

五十一

河南商務印刷所印

牛奇生

〔採訪事實〕天性醇篤事母備色養侍疾謹湯藥衣不解帶者數月

謝 熙

〔採訪事實〕性篤孝早孤奉母後病癱身負出入者且十年少嗜酒母病後滴瀝不沾唇母病哀毀倍至里閭憐之

張王聘

〔採訪事實〕庠生康熙季年嘗載粟一船值四百金至儀封值歲荒出貨於人遂折券不復求價

康 樞

〔舊志〕邑庠生性孝友姊適閭門家貧且乏嗣樞體親心以成姊之節操康熙六十年歲飢鄰里有日不舉火者樞出粟不吝全活甚衆子中發增廣生中倫庚子舉人

李景泰

〔舊志〕性純孝竭力悅親歲歉進膳必豐潔親日荒年谷不易得况若甘且適乎親歿居喪合禮人稱孝焉

以上二條補逸

